

114學年度內湖國小語文競賽
客家語朗讀文章國小學生組（四縣腔）
編號 01 號

【蛻變】徐佳好原作

記得俅仔讀小學個時節，放學轉到屋下興啲啲仔¹同佢分享，上自然課，先生紹介揚蝶仔，佢感覺著當生趣，問佢：「阿姆，做得畜虐毛蟲無？」佢淨聽過有人畜細魚仔、蠶仔²、雞油姑，哪有人畜虐毛蟲？

該時，佢在學校做志工，同圖書室個細阿姊仔打嘴鼓，佢講：「淨愛種一頭柚仔樹抑係柑仔樹，就會有揚蝶仔飛來生卵。你過準備一隻罐仔，裡肚放一支細樹椗，恁樣就做得哩啲。」佢一聽著，心肚當疑狐：自家又無歇在莊下，種一頭柚仔樹就會錫揚蝶仔來，哪有可能？毋過，「狗呷烏蠅，賭造化」³罔試看啊。

講來奇怪咧！有一日，正經有一隻揚蝶仔，在佢兜種個柚仔樹脣飛來飛去，飛上飛下。心肝恹：佢在該做麼个呢？佢目金金仔緊看，佢緊撲翼，又對屎肫尾緊屙出細細粒、黃臘臘個卵在葉仔頂。佢細心細意，摘下這皮葉仔帶轉屋下放到罐仔裡背。

幾日過後，幼蟲對卵肚鑽出來，一出世，黏時食忒卵殼。虐

毛蟲當揀食，淨食合意个葉仔，像一個當肚飢个細孬仔，葉仔分佢食到淨淨淨，淨伸葉脈，俅仔都赴毋掣摘葉仔分佢食！佢兜緊食圓身緊大箍，該白烏色个衫褲忒狹，僅可脫下舊衫換青衫。

有時節，蠻皮个俅仔係「頭那插禾串」撩刁佢，佢會跔等臥起圓圓大大个頭那，還過伸出紅紅个角，放出像榴槿恁樣臭胖胖仔个味緒，想愛嚇走欺負佢个人；毋過，若係正經堵著烏仔、油籬蜂，佢兜斯插都毋插。有一擺，佢識看著，自家畜个虐毛蟲毋知分對哪來个蜂仔食忒，衰過个虐毛蟲，瀉都毋掣！一無注意，嘎發生恁樣悲慘个情形，實在得人驚！

虐毛蟲每日都盡命牯緊食葉仔，食到圓身肥卒卒毋知飽。有一日暗晡，看佢腦轉⁴，葉仔毋食，淨在罐仔肚趁來趁去，毋知在該無閒麼个。佢屙了一堆青青个瀉粑，俅仔問：「佢係發病仔無？仰會屙痢肚？」忽然間，佢趁在該樹椗頂，呢絲⁵同自家吊掛起來，摻自家跔等⁶，罔在蠶笱⁷肚，像睡忒哩！

過一禮拜零，蠶笱變色，像變奇術樣仔，虐毛蟲對蠶笱肚鑽出來哩啲⁸！毋過，溼溼、皺皺个翼還言燥，佢定定仔、柔柔仔，當有耐心个等待，正經係老古人言講个：「甘蔗食了一目正一目」，毋好「打卵就愛見黃」。看著這靚膩膩个花仙子，親像係同佢兜講等人生當多道理啊。

¹ 興啲啲仔：音 him du du e`；興沖沖的。

² 蠶仔：音 cam` e`；蠶。

³ 狗呷烏蠅，賭造化：音 gieu` gab vu` in`，du` co fa；狗突然張口去咬飛過的蒼蠅，能否咬到就看運氣。

⁴ 腦轉：音 din` din` no` zon`；繁忙、躁動不安。

⁵ 呢絲：lien` sii`，吐絲。

⁶ 跔等：音 giu` den`；蜷縮著。

⁷ 蠶笱：音 cam` giab`；蠶繭。

⁸ 哩啲：音 lio`；語氣詞「哩、啲」合音，表示變化已經實現。

114學年度內湖國小語文競賽
客家語朗讀文章國小學生組（四縣腔）
編號 02 號

【阿咪¹】李夢花原作

吾屋下從來就毋識畜狗畜貓，一來係阿姆歸日仔做事無閒泊杈，又愛無閒煮三餐，二來係佢當愛淨俐，畜狗仔同貓仔驚怕會遭跳蚤。一直到老弟間房个天篷頂，逐暗晡一群老鼠在該走來走去，呼呼磅磅²吵到佢睡毋得，正高不將同上屋个鄰舍，捉一隻細貓子畜來打老鼠。

鄰舍个貓嫲這胎正養兩隻，一隻就係吾屋下這隻，灰色間³白色同豬肝色花刺花刺⁴，看起來當精靈、當得人惜，佢兜喊佢「阿咪」。另外該條柑仔色間白色，乜異靚，分雜貨店个叔姆捉去畜。阿爸講新捉來个貓仔，定著愛綯到有四支桌腳个下背幾日仔，恁樣正會認屋，阿爸就摻佢綯到桌腳下。正經有影哦！幾日仔放佢，阿咪就乖乖乖，毋會儘採走。

因為毋識畜過貓仔，阿姆乜毋知愛分佢食麼个？人講：貓愛食臊。阿姆就用四破魚攪飯飼。一站仔過後，阿爸講：「毋好分

佢食忒飽，慣勢咧就毋會去打老鼠。」聽雜貨店个叔姆講厥屋下該隻，就係食到肥固固仔，日日食飽睡、睡飽食，連老鼠在脣頭過，佢就目珠擘開睇一下，做佢睡。該幾日逐朝晨，阿爸就去豬砧買一坵豬肝分阿咪食。第一擺豬肝買轉來，阿姆愛拿來煮熟，阿爸煞煞講：「分貓仔食生豬肝，係愛佢慣食生个味緒，正會去打老鼠，該下二擺佢打著个老鼠，你愛煮熟正分佢食係無？」阿爸講个異有理，佢兜聽了哈哈大笑。

阿咪日時頭走到倉庫睡目，暗晡頭就係佢行動个時間，在暗摸胥疏个暗晡頭，看著佢个目珠仁，像兩粒青色个寶石樣仔當金當靚，灶下个黃蛭趨來趨去，佢一爪搭一隻，非常流掠。就毋知佢曉打老鼠無？毋過，自阿咪來了以後，老弟間房个天篷，就無老鼠在該跳舞哩。

毋多知仔，阿咪畜有十四年咧，照 人个年齡換算，佢有七十零歲哩。該日阿咪懶甥甥仔無精神，食个東西又嘔出來，好得看過獸醫注射過，幾日仔就好咁。阿姆笑笑仔對阿咪講：「你同佢共樣，老咧。」阿咪當像聽得識樣仔，第二日打隻細老鼠挑挑放在灶下，像係愛摻阿姆講：「莫笑佢老刀嫲無鋼——奈毋何，佢還異慶哪！」動物除了毋會講話，佢兜同人共樣，係有感情有靈性个，還有該種毋認老个打拚精神啊。

¹ 阿咪：音 a' mi；貓的名字。

² 呼呼磅磅：音 bin bin bong bong；狀聲詞，形容老鼠在天花板跑動的聲響。

³ 間：音 gam；摻雜調和。

⁴ 花刺花刺：音 fa' la' fa' la'；花色混雜。

114學年度內湖國小語文競賽
客家語朗讀文章國小學生組（四縣腔）
編號 03 號

【大箍牯減肥記】曾菁怡原作

「哇！歸桌仔恁多好料仔！汽水、餅仔、披薩、雞卵糕、枝仔冰，還有佢盡好食个焗菜、雞髀¹。」佢看到無瞞目，口涎水強強會跌下來，該兜好料仔像同佢揸手講：「遽遽來食，遽遽來食唷！」佢煞煞抓一支香噴噴仔个雞髀，該油亮油亮个皮焙到爛爛，肉汁汀汀汀汀，實在還錫人哪！就在佢嘴擘到大大，準備咬啊下去該下， 嘎聽著：「大箍牯，還毋跣床？讀書會赴毋掣哩！」全部个好料仔一下仔嘎毋見忒，原來，係發夢啊！有一息仔毋願，該雞髀無咬著，實在還打爽哦！

聽吾姆講，佢從細就異好嘴斗，生到肉卒卒仔，幼皮白肉，盡得人惜。公太就盡愛撚吾面頰卵，講佢像正打好个粢粩仔分人想愛咬一口。原本佢無感覺肥固固个身材有麼个毋好，但係該擺見笑个經驗分佢堅心愛減肥哩。

該日學校辦校慶活動，吾班級表演「三隻細豬仔」个話劇，佢係擔任豬大哥个角色。就在節目進行到豬大哥同豬二哥為著閃避大野狼，愛走去豬老弟个屋仔園該下，為著有緊張个氣氛，佢

盡命牯飆過去愛鑽入豬老弟个屋仔裡肚。麼人知，一下忒大力，豬老弟个屋仔嘎分佢撞橫下去，佢還仆在屋仔面頂，屎肫翹到半天高，纏繃繃仔个褲弓到暴線縫.....。該時，鬧熱煎煎个禮堂忽然間變到一片恬靜，佢還聽得著自家砰砰砰个心跳聲，額頭流下來个汗水每一滴佢就感覺得著.....，實在還見笑哦！愛仰結煞正好？落尾，有聲音摻佢解圍哩，佢遽遽企起來行到舞臺層換褲；該聲音，毋係佢期待个拍手聲，係大家笑到歸身仔緊顫、目汁雙流个笑聲。

校慶結束該日，桌頂个乳茶、雞排全部分佢擲到垃圾桶，佢第一擺有恁強个決心，絕對愛減肥成功。佢去網路尋減肥个方法，大體係減量、減油、減糖，還愛配合適當个運動，故所該兜油漬漬仔²个焗菜、甜濟濟仔³个汽水、糖仔全部分佢拒絕，逐餐飯菜都食較清較齋兜仔，食到七分飽就好。佢還每日運動三十分鐘，行路、打球仔、跳索仔.....，逐日做無共樣个變化。

一隻月過後，吾姆帶等佢去買新衫褲，每一領个尺寸都減兩號，阿姆講：「從今以後做毋得過喊你『大箍牯』咧。」「係啊！你愛喊佢『緣投哥』哩。」

大箍牯減肥，成功！

¹ 雞髀：音 gie' bi`；雞腿。

² 油漬漬仔：音 iu` ji ji e`；形容沾滿了油。

³ 甜濟濟仔：音 tiam` ji` ji` e`；形容味道甜膩。

